

摘藻堂四庫全書薈要

史部

欽定四庫全書薈要卷七千六百九十八

吏部

春明夢餘錄卷四十七 吏部侍郎孫承澤撰

工部二

寶源局

寶源局在城之東石大人衙衙蓋石亨舊宅也亨伏誅宅沒入官嘉靖中賜仇鸞鸞敗復沒入官因改為鼓鑄公署虞衡司員外郎監督其事所屬有寶源局大使國初鼓鑄之事惟屬工部至天啓二年始增寶泉局其政

屬於戶部而工部之所鑄者微矣

錢自周景王以前皆漫無文至南宋廢帝景和元年鑄二銖錢文曰景和錢有年號自茲始然杜佑通典載宋武帝鑄四銖錢文曰孝建則錢有年號又不始於景和矣至後漢曰漢通元寶周曰周通元寶至宋之開寶中所鑄錢文曰宋通元寶至寶元中所鑄錢文曰皇宋通寶皆不用年號錢始於周太公然商紀紂厚賦歛以實鹿臺之錢則商時已

有錢名矣

周錢為幣本皆足陌梁武帝時以鐵錢之故商賈浸以姦詐自破嶺以東八十為百名曰東錢江郢以上七十為百名曰西錢京師以九十為百名曰長錢大同元年詔通行足陌詔下而人不從錢陌益少至於末年遂以三十五為百唐之盛際純用足錢天祐中以兵亂窮乏始令以八十五為百後唐天成又減其五漢乾祐中王章為三司使復減

三皇朝因漢制其輸官者亦用八十或八十五然諸州私用猶有隨俗至於四十八錢太平興國二年始詔民間緡錢定以七十七為百自是以來天下承用公私出納皆然故名省錢但數十年來有所謂頭子錢每貫五十六除中都及軍兵俸料外其餘州縣官民所當得其出者每百纔得七十一錢四分其入者每百為八十二錢四分元無所謂七十七矣民間所用多寡又益不均云

明初置寶源局鑄大中通寶錢與歷代錢兼行以
四百為一貫四十為一兩四文為一錢置官治之
即位以後鑄洪武通寶錢當十當五當三折二若
小錢凡五等當十錢重一兩當五重五錢當三折
二重如其當之數而小錢重一錢六年禁私鑄八
年罷寶源局造大明寶鈔每鈔一貫准錢千文銀
一兩其餘以是為差曰一貫五百文四百文三百
文二百文一百文凡六等每鈔四貫易赤金一兩

禁民間不得以金銀物貨交易違者治罪告發者
就以其物給賞有以金銀易鈔者聽凡商稅課諸
色錢鈔兼收錢十之三鈔十之七百文以下則用
錢十年置各布政司寶泉局鑄小錢與鈔兼行十
三年令在外在京各置行用庫令民間鈔貫伯昏
爛者入庫易換量收工墨價值二十三年令造小
錢一十文至五十文以便民用每生銅一觔鑄小
錢一百六十折當二錢八十當三錢五十四當五

錢三十二當十錢一十六二十三年定錢制每小
錢一文銅二分其餘四等錢依小錢制遞增二十
四年令諸商稅課程但鈔貫有字可辨真偽者不
問破爛油污水跡紙補即與收受二十六年罷各
布政司寶泉局其明年禁行錢專用鈔永樂元年
以鈔法不通令民間有用金銀交易者以姦惡論
有能首捕者以所交易金銀充賞五年令各色稅
程課程俱准折鈔以重鈔法七年設寶鈔提舉司

於北京八年鑄永樂通寶錢於天下而錢復兼鈔
矣宣德正統中並重鈔法至景泰四年聽民間鈔
錢相兼行使成化十三年嚴鑄私錢之禁十六年
嚴棟錢之禁但係圄圖錢即便行使勿拘年代遠
近弘治中民間往往有盜鑄錢遂有新錢及鉛錫
薄小低錢倒好皮棍等項名色于是鑄弘治通寶
錢官吏俸薪並給通寶錢諸稅課衙門一半收洪
永宣三朝制錢如無三朝制錢者折收舊錢二文

以示懲罰正德七年令職官折色俸給十分為率
一分折錢九分關銀嘉靖三年令民間用好錢每
銀一錢七十文低錢每銀一錢者倍之四年令收
稅課每鈔一貫折銀三釐每錢七八文折銀一分
六年鑄嘉靖通寶錢每文重一錢三分與洪武錢
相兼行使隆慶元年令民間貨鬻值銀一錢以下
止許用錢國朝制錢凡歷代舊錢每八文折銀一
分不許任意低昂四年鑄隆慶通寶錢成命戶部

量放京官折俸萬厯造金背火漆錢每六文作銀
一分崇禎末戶部司務蔣臣請行鈔法錢法侍郎
王鰲永力主之然卒不能行

鑄錢則例

洪武間當十錢一千箇燠模用油一斤一兩三錢
鑄錢連火耗用生銅六十六斤六兩五錢炭五十
三斤一十五兩二錢當五錢二千箇燠模用油一
斤四兩鑄錢連火耗用生銅六十六斤六兩五錢

炭五十三斤一十五兩二錢當三錢三千三百三
十三箇燠模用油一斤一十四兩鑄錢連火耗用
生銅六十五斤九兩二錢五分炭五十三斤八兩
三錢五分析二錢五千箇燠模用油二斤五兩五
錢鑄錢連火耗用生銅六十六斤六兩五錢炭五
十三斤一十五兩二錢小錢一萬箇燠模用油一
斤四兩鑄錢連火耗用生銅六十六斤六兩五錢
炭五十三斤一十五兩二錢弘治十八年題准每

銅一斤加好錫二兩銼匠每一名一日銼當十錢
二百五十二箇當五錢三百二十四箇當三錢四
百六十八箇折二錢六百四十八箇小錢一千二
百六十個嘉靖中則例通寶六百萬文合用二火
黃銅四萬七千二百七十二斤水錫四千七百二
十八斤炸塊一十四萬五千斤木炭二萬斤木柴
二千三百五十斤白麻七十七斤明礬七十七斤
松香一千五百六十六斤牛蹄甲十萬箇沙礶三

千五百二十箇鑄匠工食每百文銀三分八釐萬
歷中則例金背錢一萬文合用四火黃銅八十五
斤八兩六錢一分三釐一毫水錫五斤一十一兩
二錢四分八毫八絲炸塊二百三十九斤八兩一
錢一分六釐七毫木炭四十五斤六兩二錢四釐
四毫白麻一十一兩六分六釐六毫松香二斤一
十三兩六錢二分四釐四絲沙礮六箇鑄匠工食
銀三兩六錢五分火漆錢一萬文合用二火黃銅

斤兩同牛蹄甲一百八十五個一分八釐餘皆同
前凡在外各處鑄錢北平二十一座每歲鑄錢一
千二百八十三萬四百文廣西一十五座半每歲
鑄錢九百三萬九千六百文陝西三十九座半每
歲鑄錢二千三百三萬六千四百文廣東一十九
座半每歲鑄錢一千一百三十七萬二千四百文
四川一十座每歲鑄錢五百八十三萬二千文山
東二十二座半每歲鑄錢一千二百一十二萬二

千文山西四十座每歲鑄錢二千三百三十二萬
八千文河南二十二座半每歲鑄錢一千三百一
十二萬二千文浙江二十一座每歲鑄錢一千一
百六十六萬四千文江西一百一十五座每歲鑄
錢六千七百六萬八千文

工部條議鑄錢必用水錫者以銅性燥烈非用錫
引則積角不整字畫不明倘有四火黃銅則水錫
乃必需之物近商銅日低錫似宜裁前任王員外

呈議以錫易銅歸錢內蓋欲錢體厚重期於久遠
惟是錢自有定式如果合式則錢自不輕與其以
錫換銅而以四斤五兩四錢八分之數加重於一
萬文之內不若計銅增錢而以四斤五兩四錢八
分加多於一萬文之外蓋水錫五斤一十一兩二
錢價銀四錢五分六釐照價買淨銅四斤五兩四
錢八分可鑄錢四百八十三文如鑄錢十萬即多
四千八百三十文錢矣積而累之其數無窮如此

則公家有水錫之費而亦有水錫之利爐役無侵蝕之弊而亦無冒領之名若後果有四火黃銅相應仍用水錫庶不失立法初意至於嚴禁低銅成色不足者依法重處尤正本清源第一義也

萬歷中給事中郝敬錢法議錢者古帝王經國之良法也天生五金并為民利而金銀最少鐵錫太賤惟銅為適中古今之通幣也因其自然之利濬其不竭之源存乎人與法耳今海內行錢惟北地

一隅自大江以南強半用銀即北地惟民間貿易而官帑出納仍用銀則錢之所行無幾耳舉天下之人用其最少者若之何不匱况逐年九邊之費往而不返頃者天府之入又閉而不出銀非雨之自天非湧之自地非造之自人奈何不竭竭而強取則民病取之不得則國病必然之勢也惟銅則不然二百餘年來錢法不修天下廢銅在民間為供具什器者不知幾千萬億其產於各處名山者

豪姓大賈負販以擅厚利又不知幾千萬億假使
盡天下之銅化而為錢則盡天下之銅皆可貿銀
而歸之太倉以助司農之急蓋銅因於山自然不
費而錢成於人鑄造無窮上不動朝廷錙銖而厚
裨於國下不朘閭閻膏血而陰厚於民生財之道
無踰於此乃格於議論束手坐視莫肯決行是管
仲計然之所揶揄而竊笑也謹循職掌條議於後
一曰責專官凡錢法不行以有司不肯收錢徒

責之小民也所以使有司得操其收不收之權者
由朝無專責之官以錢法委之有司不知錢法行
有司之所不便也欲行錢宜責成司道官董其事
選委地方廉幹屬官分理每年差御史一員巡視
以錢法之行滯注各官之能否事干錢政一體糾
劾庶事有責成不致推諉底績不難矣 二曰定
規則凡官吏所以喜收銀以收銀有加耗稱頭支
放有那移侵減若錢不可期羨不可隱銀輕易聚

錢重難携故百計阻格今宜先立規制自某年始
有司徵稅除起運照舊收銀其餘存留支放者銀
錢中半兼收小民不許一概納銀有司不許一概
收銀令納戶赴各府鑄局換錢回本處州縣納庫
每紋銀一錢限換與小民銅錢八十五文小民納
銀一錢者止徵銅錢八十三文官給錢與鋪戶變
賣亦照八十三文鋪戶賣與小民紋銀一錢限八
十一文小民自相交易止八十文如此則民有微

息無不悅從矣一切上下俸薪並工食俱銀錢中
半支給各府州縣扣定每歲除半銀若干外該半
錢若干申詳合於上司刊入由票永為遵守各衙
門贓罰紙贖亦銀錢兼收或全收銅錢尤見美意
敢有勒要小民全銀希圖加耗者巡按御史叅究
三曰廣鑄局官不收錢民無用錢之處故錢法
不行官既收錢民無錢可用法亦不行或議每省
設一鑄局以一局供數十州縣不足用也錢初行

須布散周流多開鑄局廣募工匠大府地廣糧多者一府一局量州縣之數為爐之多寡小府錢糧少者一道設一局可也工部選寶源局嘉靖新錢金背平圓光亮者每省給樣錢二三千文該布政司轉發各府依樣鑄造不必太重每錢一文定制官法馬一錢二分為準每銅加錫一斤鑄錢一百三十文有奇銅錫驗勘原解足色下火不許工匠偷換摻和字畫邊文務鑿確光平俱以大明通寶

四字為文以便永行如式樣至薄文理模糊比式不合者監造官初犯戒飭再犯追賠鑄造如法者工匠加賞仍令轉相教習其局中一應利弊聽監造官講求禁緝因考其能否三年之後錢多足用量議減局 四曰採礦銅買銅鑄錢則所費多今雲南陝西四川廣東各省有銅礦為姦商專擅或封閉未開為土人竊發宜選廉幹官一員為錢運使專理銅課重其權而久其任臨洞開採禁緝私

販各省巡錢御史按季差委的當職官給與勘合公文前去運使衙門關領官銅回省轉給各府鑄造其各省支銅量各礦近便者坐派每歲支銅若干即以地方銀錢中半兼支之數起例假如應支銅錢一萬三千三百文坐派銅一百斤以錢輕重準銅之多寡如礦銅一時採銷不敷設法權買接濟其鑄法每銅一斤和錫數兩則錢色光潤宜于該省出錫地方每歲酌量派徵本色錫若干解赴

錢運司收貯照數轉給每給銅一百斤搭錫若干
斤傾驗足色交付解官領回巡錢御史衙門勘驗
轉給錢法道給散該府 五曰處工本起鑄須工
本工本無措稱法不便者藉口矣今必不費官帑
但查該府各州縣額派存留銀兩先一年十二月
預借徵四分之一解府支用假如一縣存留銀共
二千兩移五百兩解用候鑄錢成儘先給還前銀
每兩照例給還算錢八百三十文通計原銀五百

兩該還銅錢四十一萬五千文領回兼銀支放或
即以準小民初一年納錢之數亦可大約鑄造之
費每銀一兩可鑄錢一千二百文銀五百兩可鑄
錢六十萬而還抵之外尚餘錢一十八萬五千文
給鋪戶變賣可值銀二百二十二兩九錢此皆以
尋常費工本鑄造者論也若因銅於礦不勞買辦
止於匠作工食所費益無幾矣奉行得人前銀五
百兩可無多費而更增二百二十兩有奇之息由

五百兩以推至千萬由一縣推之天下即此那借
子息已不下百萬矣自此以後惟因自然之利盡
人官之力有增無減錢日多于下利日歸於國大
倉之積計日可充矣 六曰鑄大錢錢法始行鑄
造不行則有權宜變通之法古者以大錢為母權
子行其費少而利多今宜另開秘局一所鑄大錢
或一當三十或一當五十務極精工不必大重但
以文為別曰大明通寶旁註當三十字樣與小錢

留支給銀十萬兩即該一半換錢計四千二百五十萬文該領過運司銅錫三十二萬四千四百九十斤有奇該變賣過銀五萬兩濟邊此其大約也

八曰禁盜鑄官錢精好則通行無滯錢精好工費多姦民無厚利盜鑄自少盜鑄之錢自然粗惡官錢一被混雜民遂囂然疑阻錢法之壞多由此所以從來禁私鑄非但為利權不可下移亦以防阻滯也今宜嚴為之禁但捕獲私鑄真贓者一文


以上皆斬知而不舉者連坐出首得實者賞銀二十兩 九曰嚴稽算各局鑄錢事千軍儲凡逐年收過銅錫鑄過新錢賣過銀兩起解過數目責成監守置籍稽查勿使工匠朦朧冒破吏胥那移侵欺此一廉幹御史理之有餘矣 十曰重賞罰令行禁止存乎賞罰信賞必罰天下無不辦之事苟且依違則仍成故套今國計艱窘忠藎之士自然曲體其偷安蒙蔽者必惡臣言多端遮飾了事是

今日之痼疾也宜著為令凡各官能疏通錢法每
年鑄錢解銀如額者超級陞用貪情違玩阻格不
行者聽錢法御史叅提重處當超陞者決然超陞
當叅問者決然叅問令出必行禁出必止有不沛
然四達者乎 十一曰曉愚民夫錢本銅也而以
代銀民用銀久一旦更易不能無疑不肖官吏乘
隙煽惑則陰壞其法宜令該部轉行申諭各省開
示各府州縣軍民人等詳曉以朝廷便民抑貪省

斂之意勿使姦吏猾胥倡為浮議庶閭閻遵信則
令行如水 十二曰信命令前此錢法亦常議行
未幾報罷今民欲蓄錢恐一旦中改則錢之積無
用宜詔諭天下確然示以必行永久之意使百姓
安心為長久計 十三曰聽販賣地方商人屯錢
販賣官司往往禁之蓋因錢少販多則地方空虛
民不足用今既廣開鑄局則錢多販賣者亦多流
通布散小民得錢易於出手亟宜聽之 十四曰

因民便各省舊用錢地方多舊錢或者議禁舊錢以疏新錢民未見利先稱害矣宜聽新舊兼用若淮北用鵝眼雲南用海肥隨便兼行至於原用銀地方則決然全用新錢以上十四條皆據臣職掌謬陳一得倘垂採納未必非軍需之一助也

春明夢餘錄卷四十七



總校官庶吉士臣侍朝

校對官中書臣孫希旦

膳錄舉人臣韓騰

欽定四庫全書叢要

史部

春明夢餘錄卷四十八

詳校官編修臣繆晉



欽定四庫全書薈要卷七千六百九十九

史部

春明夢餘錄卷四十八 吏部侍郎孫承澤撰

都察院

都察院在皇城之西與刑部大理寺並列稱三法司初設御史臺洪武十三年改都察院十七年始定設都御

史即古御史大夫之職副都御史僉都御史即古中丞之職副都左右各一人僉都四人主天子耳目風紀之司凡大臣奸邪小人構黨作威福亂政者劾凡百官畏

葺貪冒壞官紀者劾凡學術不正上書陳言變亂成憲
希進用者劾而朝覲考察都御史入天官臺司賢否黜
陟之斷大獄重囚會鞫於外朝或奉旨同刑部大理寺
讞平之

屬十三道監察御史主察糾內外百司之官邪或露
章面劾或封章奏劾凡差在內京畿道刷卷巡營軍
提學清恤軍巡視光祿巡倉庫城門在外巡按清軍
刷卷巡鹽茶河關印馬屯田師行則監軍紀功各以

其事專監察而御史巡按則代天子狩轄所按藩服
大臣若府州縣官諸考察舉劾尤專大事奏裁小事
立斷而河南道獨專諸內外考察凡朝會糾儀祭祀
監禮凡政事得失軍民利病得直言無避凡罪囚按
巡審錄有故出入理辨之凡大獄勅下臺推奏當上
聽裁常獄疑罪移評大理寺凡有大政集闕廷預議
焉蓋六部有專司而都察院惟所見聞得糾劾無職
司乃憲綱諸御史糾劾務明著實跡開寫年月毋虛

文從詆訐拾細瑣抑戒令其事慎重焉而御史出按復命都御史覆其稱職不稱職以聞又御史犯罪加三等有贓從重論

周禮御史掌邦國都鄙及萬民之政令以贊冢宰凡治者受法令焉掌贊書凡數從政者按鄭注大宰以六典治邦國八則治都鄙八統治萬民治出於令而贊之以書者御史也蓋內史出王命外史書令御史為之屬則贊二官之書以百官班籍繫

爲故亦以書數之即其數而數從政則察其不職者而使之各修其職亦贊書也

戰國時亦有御史秦趙澠池之會各命書其事又淳于髡謂齊王曰御史在前則皆記事之職也至秦漢始爲糾察之任所居之署漢謂之御史府亦謂之御史大夫寺亦謂之憲臺後漢以來謂之御史臺亦謂之蘭臺寺梁及後魏北齊或謂南臺唐龍朔改御史臺曰憲臺咸亨復舊門北闕主陰殺

也御史為風霜之任初漢故事選郡守相高第為御史大夫任職者為丞相唐制御史大夫一人中丞二人其屬有三院一曰臺院侍御史隸焉二曰殿院殿中侍御史隸焉三曰察院監察御史隸焉大事奏裁小事立斷凡有彈劾御史以白大夫大事以方幅小事署名而已宋初沿唐制太平興國中以張巽為監察御史正名舉職自此始元豐中以御史專領六察其後以中丞為臺長知雜御史

為侍御史言事官為殿中侍御史六察官為監察御史

西漢直指使者得擅誅刺史二千石以下東漢遣八使巡行二千石有罪者驛馬上之墨綬以下便輒收舉其權任之重如此

元上都御史臺殿中司記按漢御史大夫有兩丞其一曰中丞居殿中蘭臺外督刺史內領侍御史受公卿奏事舉劾按章亦謂之中執法則居殿中

者實古中丞之職魏以二御史居殿中察非法大朝會則簪白筆側陞而坐乃殿中設侍御史之始也其後殊時異制沿革靡常在唐則兼知庫藏出納宮門內事京畿諸州諸衛兵禁而政務非一在宋則三院並得言事兼察事而官守不分逮元世祖皇帝至元五年肇建御史臺置殿中侍御史二員而以殿中別為一司正名舉職糾察朝儀外廷稱慶則對立于龍墀之下而不與庶僚序列大駕

行幸則畢從于豹尾之中而非若他官可以便休
委任既專地位復密臣僚有所敷奏無不與聞而
其命秩之崇品在第四視唐宋以七品官為之重
輕之不侔從可知也自非勲賢貴胄秉清方直亮
之節夙為衆所嚴憚莫敢當其選由是而致位卿
相未始乏人誠欲使來者知所慕效而思維其風
烈則所托以昭示於永久者曷可缺歟

都御史

都察院古御史府也明太祖洪武初一循元舊當
是時左右大夫湯和鄧愈數膺斧鉞寄外出而中
丞劉基章濫理臺事其後汪廣洋陳寧輩俱遷大
夫洪武十三年胡氏之事發而御史臺僅設左右
中丞俱正二品侍御史正四品而已十四年始改
御史臺為都察院然僅正七品其官有御史而無
都御史十六年仍為正三品明年為正二品於是
定設左右都御史正二品左右副都御史正三品

左右僉都御史正四品職糾劾官邪申辨冤抑而
所屬御史分為十三道御史巡按以至他事公委
出則奏請還則考覈然御史獨不係都察院以示
得相糾察之意建文初改為御史府設都御史一
員左右副都御史各一員品如故十三道御史曰
左右兩院監察御史永樂鼎革悉復洪武之制其
後移都察院於北京而留者曰南京都察院略如
六部矣其以左右都御史而下總督提督叅贊巡

撫各鎮者初自本院出曰公差事完或得代則回
理院事其後不勝多則往往自部佐卿寺藩臬遷
轉亦不復歸院

洪武中命湯和等為左御史大夫等官諭之曰國
家新立惟三大府總天下之政中書政之本都督
府掌軍旅御史臺糾正百司朝廷紀綱盡繫於此
而臺察之任實為清要卿等當思正己以率下忠
勤以事上蓋已不正則不能正人是故正人者必

先自治則人有所瞻仰毋徒擁虛位而漫不可否
毋委靡因循以縱奸長惡毋假公濟私以傷人害
物詩云剛亦不吐柔亦不茹此大臣之體也

洪熙元年諭吏部慎選御史以清風紀又命吏部
咨訪可為都御史者以為十三道御史表率

宣德十年勅諭都察院朝廷設風憲所以重耳目
之寄嚴紀綱之任凡政事得失軍民休戚皆所當
言糾舉邪慝伸理冤抑皆所當務比之庶官所係

甚重近年以來未盡得人或道理不明操行不立
或法律不通行移不諳或逞小才以張威福或搜
細過以陷善良甚至假其權位貪圖賄賂以致是
非倒置冤抑無伸而風紀之道遂致廢弛自今監
察御史有贓濫及失職者令都御史及各道御史
糾舉黜退按察司官有贓濫及不稱職者令按察
使及其同僚糾舉黜退仍令吏部今後初仕者不
許銓除風憲凡監察御史有缺令都察院堂上及

各道官保舉務要開具實行聞奏吏部審察不謬
然後奏除其後有犯贓濫及不稱職舉者同罪

崇禎元年九月諭朕嗣宅丕基君臨宇甸念國家
無一事不倚藉經費費無毫忽不取辦小民惟此
胼手胝足之儔實係九邊庶府之命勞苦最甚咻
噢宜先所賴郡邑有司矢志循良殫心咨訪而比
年以來官方罕課吏治日非貪墨載途廉風絕響
敲扑視為故事農桑置若罔聞暴斂橫征徒縱廢

饕之欲舖行里甲半供結納之需吾民之罹於虐政者亦既不啻水火矣其地方撫按司道有察吏之責者又皆膏肓積習倒置官評樂逢媚之可親仇清白之異已抑或猥徇情面姑示調停科甲正官雖貪殘尚從寬典明經郡佐即彈劾僅取備員甚者決裂隄防弁髦風憲巡訪而貪沉湎擁傳而繁徵求躬自教猱人誰則象如此弊風更僕難指朕痛之恨之所以然者皆爾部院轡勒先弛紀綱

不立節鉞重臣置同郵傳豸驄法吏用及匪人率
作有成不問拊民之實效復命考核徒循稱職之
虛文功實由斯盡隳民生因而重困茲特諭爾吏
部今後推用巡撫務選諳練周知民隱者畀以保
釐之寄治有成績加銜久任其品足表儀才堪卿
寺者無妨薦歷清曹不必內外頻遷以節鉞為遞
傳之舍巡按各差御史於考選時即加精核在差
事宜悉依巡訪總約申飭舉行回道之日爾部院

嚴加考察有不稱職奏請處分勿得槩填稱職以
憲綱為相沿之故套仍嚴諭撫按官今後有司真
貪酷害民者不待考滿之期即時叅奏鞠核無枉
朕處以祖宗之法其論劾事情列款備載無駢詞
而失實無叅重而處輕無置豹虎而論狐狸諭頒
之後在內部院衙門即時遵守在外撫按衙門近
者一月遠者三月以內欽奉施行如或仍踵弊風
空文塞責朕得於省覽立便摘查該科看詳章奏

即行糾發以溺職治罪嗚呼稂莠盡除嘉禾滋植
聿還累朝熙平之盛庶釋一夫不獲之憂朕與諸
臣皆有令聞欽哉

又十五年四月諭朝廷聽言納諫必須言路得人
欲得人必嚴考選公諮慎核辨言試功抑競獎恬
留真去僂此原是部院職掌昨面諭已明著即悉
心詳議條列良法具奏又舊制試御史必先試以
小差果能稱職歷事經年方准實授近因缺員一

概差往巡方及至回道又未見嚴加考核殊失慎重風憲之意今著該院堂上官執法綜稽申明舊制試御史必須分別去留不得循資推數槩題按差致有不堪貽誤地方所有未盡事宜也著具本奏奪

內閣張孚敬疏昔唐韋思謙為御史大夫見王公未嘗屈嘗曰耳目官固當特立鷗鶚鷹鷂豈衆禽之偶乎宋杜衍為御史中丞宰相而下畏之曰不

肯以恩意假人者也國朝顧佐為都御史在朝大臣有貪墨不法許穿緋衣當御前面加糾舉就行拏問故都御史凡衣緋入朝之日必有糾舉大臣莫不股慄今此職不舉故大臣無忌憚朝多貪墨如之何民不窮且盜也故掌院官必在得人始能倡率撫巡揚厲百司其守令等官一有慢令害民者撫巡官即按之無貸撫巡官一有不奉法者掌院官即按之無貸則法無往不行矣

左都御史孫丕揚責成御史澄清天下疏臣惟天下澄清其象有三無暴征無橫歛合一隅之間閭而相安於耕鑿者守令澄清之氣象也不損下不益上合一省之郡縣而相勉於撫字者藩臬澄清之氣象也有道揆有法守合一世之藩臬而相率於廉隅者部院澄清之氣象也三者本於清維貪墨壞之識澄清之路而圖亟反攬轡之臣有難諉其責者皇上欲責御史而澄清矣乎斯隨地察貪當力

行馬夫都城者天下軒冕之總會海隅清濁之大本也國門之內某藩臬至篚筐之多幾何矣某守令至篚筐之多幾何矣苟物色之固可家喻而戶曉御史有專城之任者也請皇上下令巡視各御史立為季察歲察之規以防羣吏之弁髦法紀者季以為察則御史持以考兵馬司一季之內交道接禮若例者勿問已必計緝獲打點之起幾何人妄餽之起幾何人指稱之起幾何人即以定兵馬司之賢勞而年終舉劾

憑焉歲以為察則本院持以考御史一年之內臧虛
証枉無干者勿論已總計緝獲打點共若干濫餽共
若干指稱共若干即以定御史之風裁而歲冊滿政
報焉果有蹴爾疇爾甘為登隴之謀媚輿媚竈工於
乞墻之計者聽各御史隨時叅論以清士風御史敢
容隱者聽臣等叅論以肅憲體斯考取與考義利欲
掩惡而不可掩矣繩都會之貪風巡視御史責成其
可緩耶兩畿十三省者吏治汙隆之要地民生憂樂

之大關也國門之外藩臬皆有分土問官於轄不
可欺以閭閻苟察識之即知為廉而為貪御史有
專方之任者也請皇上下令巡按各御史立為一
年三年之察以防羣吏之漁獵病民者一歲諸屬
必出疆矣入賀餽受有無過濫遷官餽受有無過
濫考績餽受有無過濫時維出疆即評品之三年
諸屬必述職矣州縣科歛伊孰分外府寺科歛伊
孰分外藩臬科歛伊孰分外時當述職即旌別之

某廉吏也出疆述職無改其廉則從而賢之某能吏也出疆述職或變其守則從而糾之議在方面刺無惜於大寮議在守令糾不遺乎甲第胥聽各巡按隨事論列不待差滿之報倘罪過未盈者官職卑微者量行戒飭以清仕路巡按御史敢為炎涼者或有容隱者回道聽考以振臺綱斯一出入一辭受欲詐善而不可詐矣繩省會之貪風巡按御史責成其可少乎然澄清本源尤有當責備者

外之撫按兩臣內之部院科道是已一方士風觀

於撫按者也撫按澄清斯境內之吏治民隱莫敢
不清四海士風觀於部院科道者也部院科道澄
清斯海隅之吏治民隱莫敢不清是澄清天下固
不當專委藩臬守令至明矣內外當路胥有世道
責者也取與一苟即民瘼增向隅之悲矣臣願立
為條目禁革與天下以共改奢儉不問即士風有
濫觴之誚矣臣願立為條目約束與天下以共守

撫按以此繩守令即以身先之求諸人者有諸已
爲部院科道以此繩藩臬即以身先之非諸人者
無諸已爲澄清關鍵莫要於此若言清行濁陽儉
陰奢外辭內受斯覲顏媚世者流矣聽科道不時
訪究以清士習之本夫然後部院科道相與澄清
於內藩臬守令相與澄清於外將見人人著羔羊
之節在在敦琴鶴之風海隅蒼赤豈不利賴多哉
左都御史趙南星申明憲職疏臣聞孔子聖人其

論臣道不過曰事君以忠而已他日告子路曰勿欺也即忠之說也宮之奇曰除閹以應外謂之忠則勿欺之說也人之心凡自私自便而不可以告人者是謂閹昧之心除去之乃為勿欺欺則不忠臣之不忠猶子之不孝不可以容於天地之間臣黥淺哀頽甘心永廢蒙陛下拔置西臺為諸御史之長臣甚愧甚懼兢兢自守履繩蹈墨以求寡過亦可保其身名然未可謂稱職也即此為閹昧之

心力請除去夫臣無職也以諸御史為職諸御史
皆稱其職即臣之稱職彼衣繡持斧出而巡方者
如使百城循理萬民樂業則為一方之太平積之
則為天下之太平所以致此者非有他術惟在舉
劾之各當而已舉劾之所以不當者人務於市恩
而莫肯任怨也往者御史之巡方事竣而報命所
舉皆拘舊額固已不能悉當其後俸不及期及陞
任者皆有提薦提薦之外又有揭薦昔西漢號多

循吏班史所載者六人耳傳世之與救時固自不同然循吏亦不宜若此之多循吏若此其多也則宜有治理效而小民之窮苦憂愁愚弱者為鬼桀黠者為盜何哉以臣所聞見天下豈無循良而貪黷成風無術可禁自大戶改為條鞭而徵收日重有一兩而加二三錢者貧民糧少無不加倍或父子不許合封所得尤多故有司鮮不立富者買物皆與半直名曰官價或分毫不給叅謁上官輒令

行戶隨之置辦下程餅師酒保皆受其累而又有
喜于作威者不問事之大小一怒輒折人之肢體
傷人之性命此輩常得薦舉非上官皆不之知也
又非皆知之而故昧其本心也不過曰此吾之同
鄉故舊不能忍也曰此權要之所託也是能報復
不可劾也不劾則須舉之又從而過譽之貪者廉
于伯夷而酷者惠於子產凡今之人誰無相知求
人請託誰不能者以此舉人誰不可舉其所劾者

皆貪酷而孤拙者耳又率多從寬故曰舉劾之不
當以人務于市恩而莫肯任怨也夫任怨之于以
保祿位甚為不便臣年雖已長忝竊過分如不肯
任怨而徒委之後進小臣以苟且塞責則亦不忠
之甚矣夫京官六年而考察御史按滿堂上官發
河南等道查覈亦謂之考察言其任怨同也萬厯
二年十一月內該本院題為考察事節奉神宗皇
帝聖旨御史差滿考察先朝事例甚嚴近來通不

遵行一槩都准回道豈人人盡皆稱職無過者及
遇京官考察之時却如何又有紛紛議論今後務
要申明舊例着實舉行有不稱的即便叅奏改黜
不許回道欽此十八年十二月內該本院同吏部
會議薦舉規則具題節奉神宗皇帝聖旨是近來
薦舉汎濫屢有明旨禁飭通不遵守今後撫按官
薦舉務查照萬厯九年以前額數不許聽囑徇私
任情偏濫有故違的該科指名查叅欽此俱經欽

遵在卷每遇按臣差滿具題回道皆以為據臣極力行之即為盡職何必多言哉但舊章之廢弛已久則修舉反若亂常人情之偷惰相安則振作即為多事臣德薄名微適足以結怨而無益於殿最也必仰藉陛下之威命以行之而後可紀綱之廢人心邪也沉迷未悟而遽繩之以法則人不能堪先必教誨之使知陛下之德意而後可天啓二年內該山東巡按御史董羽宸糾劾不職有司奉聖

旨這論劾各官贓私數多着巡按官即提問追贓
充餉事完議處該部知道欽此仰見陛下之匡飭
吏治若此其嚴也臣請以後按臣差滿通將其所
舉劾令河南道發單各道一一細加咨訪如考察
之例類送堂上官必舉劾允當而後為稱職否則
即以不稱職論夫臣之欲保祿位非與人殊何樂
乎任怨若此哉誠以不如是則民不安民不安則
社稷不安今天下禍深於邊疆兵連於黔蜀而內

地之赤子化為妖賊俘虜亦可謂不安之甚矣陛

下即位以來宵衣旰食未得享一日太平之樂為

臣子者乃以市恩自便有人心者之所必不忍為

也臣望陛下渙發德音使領民之吏知貪酷之必

不可為巡方之臣知貪酷之必不可薦提薦揭薦

必不可行所薦者必不可為溢美之言所劾貪酷

之吏必不可僅擬降調從此惕然猛省惻然愧汗

翕然回心而向道共圖百姓之安使臣無怨之可

任而諸臣功名日高祿位從之名實甚粹美光慶
及子孫豈非仕人之上願哉如以臣言為迂濶不
可行而寘之于耳臣必不敢愛一官以負陛下高
厚之恩也

左都御史高攀龍糾崔呈秀疏臣惟御史回道考
察憲綱至嚴也荷皇上之申飭不為不諄復鄭重
矣乃不意有慢視憲規恣行無忌者如巡按淮揚
等處御史崔呈秀陛下不以臣為不肖使掌西臺

豈非欲其是則是非則非無所嬖阿隱默臣初入
院適見兩御史回道一為江西巡按謝文錦一為
崔呈秀臣心訝曰異哉兩御史一時回道一至清
一至濁清濁較然臣不別白為陛下明言之是不
忠之大者也即發河南道考核無何該御史袁化
中以所考核謝文錦者至臣即以稱職考察奉聖
旨謝文錦著回道管事欽此越二旬而袁化中始
以所考核呈秀者至化中蓋有難於言者矣臣於

去年奉差而出今年復命而入往來淮揚間所見
淮揚士民無不謂自來巡方御史未嘗有如呈秀
之貪污者強盜地方大害也每名得賄三千金輒
放訪犯地方大害也得賄千金輒放不肖有司應
劾者反以賄得薦應薦者多以不賄止各御史出
巡每有節省公費助國用者呈秀到處透支至一
萬四千兩各縣賠補不勝其苦彰彰於地方耳目
不可得而掩臣等以非職掌所關不敢訪其主名

何人至於舉核失真貪酷漏網則有兩淮運司
同知譚天相在是呈秀所薦也呈秀甫離地方而
鹽臣劉大受且臚列其賊私以入告矣則有霍丘
知縣鄭延祚在是呈秀所薦也吏科都給事中魏
大中且發其饋遺奉聖旨提問矣是賄而薦之實
證也臣嘗竊歎人臣之負國實自負也受國家寵
榮極矣如呈秀者辱身辱國何如哉臣聞其知譚
天相之貪欲論劾也天相稔其易與奉之以千金

求免劾而卒免天相益稔其易與也又奉之千金
求薦而卒薦則是搖山撼岳之威祇供其禦貨攫
金之用而墻間壑斷之賤且冒居觸奸指佞之官
臣故謂其至辱所當重處以一洗巡方之辱也伏
祈皇上速賜敕下吏部議覆施行

都御史李賓推舉御史疏本院先奏御史缺員數
多請勅天下巡按御史并布按二司正官選推官
知縣中庶能名著歷練老成言貌相宜年三十以

上五十以下進士舉人出身歷任三年之上不限旌

異與否舉送吏部覈實分送兩京各道問刑半年照
例實授其有知而不舉舉而不公者罪之已蒙俞允
兼命巡撫大臣公同推舉自是惟南直隸巡撫巡按
及浙江兩司會舉數人其他顧忌畏避未見敢舉一
人者又其後止許推舉曾經旌異者且旌異多出好
惡之私又有避嫌而不肯旌異者巡按御史每年一
更有前以旌異而後不肯覆勘者其中有年貌不

相宜者有非科目出身者有旌異之後易其初心者古稱立賢無方不可拘泥又曰薦賢蒙上賞蔽賢蒙顯戮若不納賄賂不私故舊不聽請託不執偏見協於公論自然得人況今御史多缺而緊急用人之際乞如前例仍行天下巡撫巡按并布按二司正官各舉所部推官知縣凡以科目出身三年秩滿堪為御史者雖未旌異當亦舉之若復知而不舉舉而不公者仍論以法如此則振揚風紀

皆得其人而天下有司亦知所勸勉矣

大學士兼掌都察院事趙貞吉乞止考察科道疏
本月二十三日臣伏覩吏部接出聖諭朝覲在邇
糾劾要公自朕即位四年科道官一向放肆欺亂
朝綱有奸邪不職卿等嚴加考察仔細來說欽此
蓋近因御史葉某奏論邊事言辭躁妄上干聖怒
以致嚴諭臣聞之不勝驚懼臣切思葉已蒙皇上
薄示降罰足以懲一戒百矣今又因此一人遂波

及於諸臣並及前四年之諸臣一時衆心洶洶人自危臣抱此私憂故不敢默也臣查得自皇上登極以來科道諸臣僅二百人中間豈無赤心報國忠直敢言之士今一槩以放肆欺亂奸邪不職罪之其罪不容於死矣臣恐考察之日所司奉承德意過於嚴切未免忠邪並黜玉石俱焚則將來言路壅塞士氣銷阻有傷國家安靜和平之福其關係匪小也恭惟皇上聖德寬仁如天如地臣民

仰戴洋溢四海今有所激故降此嚴諭臣猥以疎庸謬承委託當此衆心惶亂之時治忽將分之際豈敢惜身保位結舌而不言哉嘗考往古漢唐宋之事皆因鈎致黨人之罪遂各將一時賢才銷磨殆盡致國空虛無以濟緩急之用而凌夷以至於不救此誠可為戒者我祖宗之制設立科道許其風聞言事或是或不是尚有執政諸臣酌量可否取自上裁縱有不當亦止各受罰責以為懲戒而

已未聞羣數百人而盡加考察一網打盡以蹈漢
唐宋之弊者也伏望皇上垂大造之恩收回成諭
特加寬赦仍許科道諸臣洗心滌慮以圖省改臣
將見聖諭之嚴既足以鎮狂躁之心而聖恩之寬
又足以作忠直之氣寬嚴並施恩威相濟萬世治
安之道也臣待罪內閣一年之內屢被科道官妄
加詆毀不勝其辱是科道官本不知臣也臣今乃
為此言以救之豈敢有一毫徇私庇護市恩要譽

之意哉天地神明實鑒此心緣臣一念朴忠實欲
為皇上尊顯聖名為國家護養元氣為天下愛惜
人材耳且臣兼掌都察院事亦有考察諸臣之責
與其調停營救於下孰若輸忠哀懇於皇上之前
倘蒙聖明垂慈曲赦宥此無知之輩豈不度越前
代光美祖宗而垂令名於無窮也哉

附方正學孝儒御史府記皇上嗣位之初即下明
詔行寬政赦有罪蠲逋租鉅萬計去事之妨民者

明年以紀元賜高年米肉絮帛民鬻子者官為之贖免田之租稅幾年分遣使者問海內所患苦賞廉平吏罪至死者多全活之於是刑部都察院論囚視往歲減三分之二人皆重於犯法二年春二月甲子有詔若曰頃以訴狀繁易御史臺號都察院與刑部分治庶獄今賴祖宗神靈斷獄頗簡其更都察院仍漢制為御史府專以糾貪殘舉循良匡政事宣教化為職省御史員定為二十八人務

為忠厚以底治平三月戊辰賜御史衣明日己巳
以都察院舊署在太平門之北於朝謁為難命即
詹事府為御史府賜宴於新治復命文武大臣皆
預以寵綏之既而有勅令臣某記其事臣惟斯民
之生以德養之則安於為善以刑制之則棄於為
惡聖人之治天下豈有他術哉使人人皆知去惡
以從善而治道成矣惟御史之官始於周其職之
所治與權任之輕重雖累變不常然得其人則綱

紀振而國體尊非其人則人望不肅而是非錯謬
然專任以刑獄則自近代始曩者法吏持刑深刻
犯者滋衆先皇帝甚厭苦之欲有所更改而未暇
今皇上以德養人羣生喜悅訟者衰止復古官名
以修善政實行先帝之遺志自今居是府者其敬
承聖訓凡便於國利於民者則言之為民之蠹為
國之病者則去之母溺於私而枉其所守毋憚於
勢而屈所當為一以道輔佐天子行德教使黎民

醇厚如三代時斯不負建官圖治之意苟為不然
舍其大而務其細或事小忠末節以市名或為詭
行儉言以規榮利於民之治否國之安危無預焉
則是官之名雖更而實之可厭苦者自若也奚可
哉臣幸執筆從太史後夫紀政教明職守以示後
世史氏職也故書其事以為居位者規

總督巡撫

漢初以合治矣其終也以分侯王而亂唐初以合

治矣其終也以分藩鎮而亂宋初以合治矣其終也
也以分南北而亂正統而後或變生於腹裡或釁
起於邊陲而諸邊諸省一時撫臣多不能振聯屬
之策興討罪之師保境以自全櫻城以自守直為
是懍懍爾若西邊之額森河土之趙賊西蜀之廖
寇江西之華林及藩濠八閩之鄧茂楚之麻陽廣
之岑猛滇之麓川猖獗震蕩而各省撫臣皆相視
而莫之能相救必設總督而後能平之彼其時非

盡撫臣之怯也亡算也爵並權均夫兩大不能以
相使而況十數大乎勢分故也列聖振長策而議
聯屬邊方腹裏多設總督以聯屬而節制之若連
環然且頒之勅如一省難作則總督調近省之食
與兵或擊其首或邀其尾或犄其左或角其右有
難則合制之難已則散而歸之無借兵之苦無萃
食之擾語曰分指之十彈不如合掌之一擊此分
合利病之說也制勢之策善之善者也難之者曰

多設總督恐多擾則不便恐多費則不便不知今天下薊遼已設總督矣宣大山西又總督以聯屬之陝西三邊又總督以聯屬之四川雲南湖廣嘗設總督矣事平罷不設假令至今存也調諸省之食與兵撻而制莽酋耳且兩廣有總督矣閩浙直又設總督以聯屬事平又罷不設假令至今存也調諸省之食與兵直拉朽而誅浙兵之亂矣近又從言者河漕總督得提督南北直隸山東河南之

兵浙江江西湖廣之食是中原一總督也即有師
尚詔者弄兵釜中第合諸路坐而烹之爾惟河漕
大臣不當令兼巡撫鳳陽爾夫鳳陽乃是陵寢之
所鍾也中原之所樞也其地重其勢尊烏可以河
漕兼也且古治水者八年萬里於外又安可飽繫
一隅哉決以另置巡臣便由是言之則邊海增兩
總督足矣鳳陽增一巡撫足矣增三臣而天下安
何費之足云且無事則總督不得侵巡撫之權有

事則巡撫不得抗總督之命若川雲總督當駐滇
或兼巡撫閩浙總督當駐浙或兼巡撫尤屬省便
又不必增官矣河漕總中原當駐淮而江北巡撫
當駐鳳陽此大聯屬勢也而鄖陽贛州之軍門又
小聯屬勢也如此則常合而不分問總督軍務官
本朝始於何時曰都御史總督軍務自正統四年
麓川之役王驥始也總兵官悉聽節制既以兵部
尚書帥師當王振好大之心遂擬糧儲故事糧儲

稱總督宣德中始也繼是而已已之變敵薄都城
石亨營城北于謙督之孫鏜營城西則江淵叅之
而已繼是而四方多警類率如例如馬昂於兩廣
石璞於關外王來於湖廣侯璉於雲南然事平則
罷又繼是而景泰天順及成化初白圭葉盛韓雍
等皆稱提督意屬協同勅以贊理為云又繼是而
為任官矣成化六年開總府於梧州此任官之所
由始矣三邊總制自弘治末年秦紘楊一清張泰

始便於徵發策應今亦為任官夫議者秉低昂文武之鈞濟兼制勦綏之術是矣而進止異同束手和混內外援搆隱於奸宄其能制而協之更當潤飾令必無伏機不亦盡乎又繼是而陳金華陽之役陸完劉六七之役至統制七省者後事而或援以為例其必有慎而馭之則可矣

天下設巡撫都御史洪武未有也太祖不欲以重臣令典錢糧兵馬永樂十九年勅尚書侍郎都御

史少卿等官十三員各同給事中一員巡行天下
是為巡撫宣德間令巡撫官每歲八月一赴京議
事蓋不欲踈逖以懸機重景泰四年纔差都御史
其意尚在執持風紀有故則入叅廟議而握纛之
柄則有司存自是則曰整飭曰提督曰總制曰鎮
守又復興兵部尚書侍郎之職兼都御史百寮羣
將俯首聽一人之謀似於兼制少踈故復以巡按
權參殺之然表裏異同痛癢不相關而司鋒鏑者

每掣肘不能自盡是近年失事并罪撫臣誠得肯
綮而當道執要可愈施矣夫天順間石亨曹欽請
罷巡撫正德間劉瑾取回巡撫彼固借私以逞要
亦不為無說苟使其置布腹心則其為毒又不可
勝言

內閣張孚敬疏臣嘗聞胡世寧議云遼東薊州宣
府大同山西延綏寧夏甘肅陝西四川貴州雲南
兩廣鄖陽南贛保定河南山東湖廣江西淮鳳蘇

松各邊腹巡撫并巡視河道御史共二十三員此等官最要得人最宜久任如宣德正統景泰年間各邊巡撫有只用寺丞等官領勅行事不必官大又如周忱在蘇松自侍郎陞尚書凡二十二年王翱在遼東自僉都歷陞副都右都左都凡十有一年于謙在河南山西一十八年陳鑑在陝西亦十餘年是皆事久功成保濟得地方生民為朝廷分憂今此等官宜於兩京各寺卿少卿大理寺丞年

深出衆給事中御史郎中在外左右布政使按察使左右叅政年深兵備副使上等知府內推陞原職高者陞副都原職卑者陞僉都十分資淺者陞署職令其領敕一般行事其有在邊不諳軍旅而善理民事者改任腹裡不為貶抑年深有勞者就彼僉都陞副都副都陞右都常管此方十分年深勞著者就陞部院掌印如正統天順年間金濂年富皆自副都陞戶部尚書不為躡等蓋先必如此

廣推方能得人後必如此重擢方能久任久任方能修葺得邊疆完固撫治得百姓安樂以為國家久安長治之計

大政記云景泰三年太僕少卿黃仕雋言巡撫重臣三司所行多被掣肘況久或變節怠終乞總敕大綱無親細事惟從輿論無執私見其事妥民安之處可以無設三司權本重巡撫初設便多齟齬尤不便於武官故石亨奏罷此黃少卿有激之言

天下承平既久官箴漸替事未必安民未必安則此官不可少惟須得人以老成靜重為主得風力御史佐之尤佳風力者何行於大奸大貪故曰持斧斧缺為貴循故事塞責完而歸之京堂開府肩摩而上矣

西垣筆記

洪武辛未敕皇太子巡撫陝西巡撫之名始于此建文元年命左都御史暴昭戶部侍郎夏原吉給

事中徐思等二十四人充採訪使分巡天下問民
所疾苦賞廉平吏黜貪墨不職者皆得以便宜行
之

洪熙初嘗命廣西布政使周幹巡視直隸浙江至
宣德元年二月幹還言有司多不得人土豪肆虐
良民苦之乞命廷臣往來巡撫庶民安田里下吏
部會戶部工部議遂命廣西按察使胡概為大理
寺卿同四川叅政葉春巡直隸及浙江諸郡此設

巡撫之始

凡遣尚書侍郎都御史少卿等官巡撫各處地方
事畢復命或即停遣初名巡撫或名鎮守後以鎮
守侍郎與巡按御史不相統屬又文移往來亦多
窒碍定為都御史巡撫兼軍務者加提督有總兵
地方如贊理管糧餉者加總督兼理他如整飭邊
備提督邊關及撫治流民總理河道等項皆因事
特設

提督總制地方不迴避本省開封人許廓以工部
左侍彰德人王彰以左都俱巡撫河南兗州人樊
敬以右通政鎮濟寧濰縣人劉應節以刑書特敕
開膠萊河張學顏梁夢龍等以直隸人總督遼薊
景泰初給事中李寔等奏近年各處鎮守巡撫等
官動經三五七年或一二十年室家懸隔患疾病
而不能相恤子女遠違遇婚姻而不能嫁娶有子
者尚遺此慮無子者更有可矜乞敕各官議許其

妻子完住量給本處官倉俸米以贍其家從之此
巡撫携家之始

督撫帶風憲之銜不獨地方利弊可言即朝廷大
政無不可入告萬歷中晉撫魏允貞淮撫李三才
皆極論天下事讀其奏疏即科道亦不多見也又
王岳為劉瑾所逐山東巡撫朱欽極言之瑾罰米
三百石而不能罪後乃寂然矣

監察御史

正統四年十月諭禮部都察院朝廷建風憲任之
耳目綱紀之寄所以肅百僚而貞百度也憲綱之
書肇于洪武厥後官制不同所宜因時改書而中
外憲臣往往有任情增益者我皇考宣宗章皇帝
臨御臣下屢以為言遂敕禮部同翰林儒臣考洪
武舊文而申明之并以洪武永樂以來祖宗所定
風憲事體著在簡冊者悉載其中永示遵守而益
之以訓戒之言凡出臣下所自增者並削去之書

成先皇帝上賓未及頒行朕嗣位之初切以風憲
為重敕有司嚴選務在得人外之憲臣復以憲綱
為言朕今於先朝所考定中益以見行事宜爾部
即用刊印頒布中外諸司遵守爾都察院其下各
道御史及在外按察司官欽遵奉行其洪武以後
憲綱凡係臣下自增者不用敢有故違必罪不恕
欽哉故諭

嘉靖敕諭朕惟民為邦本本固邦寧不可不加意

然欲民安又必慎用守令然後乃獲所安近屢有
旨命吏部多方選授用心考察外但未聞某官果
賢某方民獲安生某官為否某方民不聊生無憑
黜陟實效未臻况近來災變多端本由朕致而百
司分理亦所不免有匡贊之責而親民之官又最
切焉今將朕偶有所見立為條目爾部院便即刊
布開示於後

守令已有旨命所司慎選外著彼到任之後務要

上遵我皇祖成法盡修職業愛惜百姓所欲者與
之聚之所惡者與之去之扶善而去其強暴尊賢
而去其不肖教之以忠孝導之以仁義勿得肆虐
用酷殘我百姓

凡軍民人等有在家能孝奉祖父恭事長上和睦
隣里教訓子弟者務要指名奏來以憑旌異不許
徇情用私

畊桑者衣食之原一家之中賴之上奉先祖父母

下養妻子八口須要依時力務男女各勤乃職但是少壯者都要耕織耕者勿怠于耒耜織者勿惰于機杼晨作晚息庶不致飢寒之苦

各處但有荒蕪不種之地著招貧民自種官給予牛具種籽不徵稅糧不許豪強侵奪及官豪人等有違一體奏來治罪

秋成之後所獲須要撙節愛惜勿得賤棄儲之以備凶歉

誤農害義蓋莫甚于釋氏之徒今尤甚焉夫彼不
過以生死恐吾民小民愚甚真信無疑漫然而不
之省遂致傷倫敗俗廢人事舍農業甚是有害世
道今雖不能盡去恐驅迫之速必至作害但要牧
民之官常加省諭禁戒其未來其見被惑者有能
舍非從正都著還做生理須要從容善誘務使轉
移如一府中有能一年化正二百人以上州一百
人以上縣四十人以上者巡按御史奏來否亦奏

來以憑考核

欲守令盡職又在巡按御史御史克盡職以為表率他自不敢不勉今後各處巡按御史著照近日右都御史汪鋐所奏事件務要遵依不得抗違以為身先之道敕內所載某官果有遵行盡職民安生業的指名奏來陞用或賜以旌獎有仍前不遵故虐小民者亦要指名劾奏治罪務要從公薦劾以憑黜陟如所否者若朝廷訪知決不輕貸如敕

奉行故諭

嘉靖六年署院事兵部左侍郎張孚敬申明憲綱
條約 一憲綱開載都察院按察司堂上官及首
領官各道監察御史吏典但有不公不法等事許
互相糾舉今後巡按御史彈劾三司不職者吏部
斟酌舉行按察司官果有能糾巡按失職者亦應
吏部查記不許科道官挾私報復其巡按清軍巡
鹽刷卷御史同事地方固宜同寅協恭亦須互相

糾察以清憲體 一憲綱開載監察御史巡歷去

處不許出郭迎接方面官相見左右對拜分坐自
後不許伺候作揖奈積諛成風卑恭過甚今後接
見之間務依憲綱舊禮敢有倨肆違背本院考察
不職三司官不知自立仍前獻諛者吏兵二部即
坐罷軟則繁文去而實效臻矣 一憲綱開載凡
監察御史各道按察司官每出巡審囚刷卷必須
遍歷不拘限期近來巡按差出者半年未見蒞任

交代者旬月不出省城今後御史點差各照水程
赴任仍具某年月日交代某年月日按某地方呈
報本院查考違限怠事者定行叅究則郡邑皆得
遍歷而奸弊無不察矣 一憲綱開載監察御史
巡歷去處如有陳告官吏不公等事須要親行追
問近有不待陳告專事訪察者亦有不親受理轉
委下司者今後不許訪察濫及無辜其必須自下
而上果有斷理不公方行受理情重者親審本院

節次發下勘合必須對款親理回報事完考察完
過六七分者方與回道管事則事不滯而民無稱
冤矣 一憲綱開載巡按所至博採諸司官吏行
止廉勤公謹者禮待之薦舉之汙濫奸佞者戒飭
之糾劾之勸懲得體人自敬服近來薦舉濫加於
庸流彈劾下及於丞尉今後歷任年深政績卓異
者方許保舉五品以上贓跡顯著者指實叅奏若
是下官不職審實提問不必一概糾劾有妨憲體

一憲網開載風憲之官當存心忠厚其於刑獄尤須詳慎苟不問事情輕重而一概淫刑以逞鍛鍊之下死傷必多夫立法貴嚴用刑貴寬凡一切酷刑之具皆宜屏去不用死刑重事必須親審無冤庶體聖明欽恤之至意 一憲網開載分巡所至不許多用導從飲食供帳只宜從儉今後巡按自巡捕官護印皂隸清道之外不許多帶人馬隨行凡設彩鋪氈無名供饋之屬一切不用其有分

外奉承者定治以罪庶免小民供億之繁奉旨卿
所奏修舉憲綱事件皆切於恤民圖治要務便行
與各處巡按御史及各按察司官務要著實遵行
若仍有蹈前弊虛應故事的堂上官查舉降黜

右都御史汪鋐申明條約 一精考察今後巡按
御史考察官吏務要廣詢密訪或詢諸田野鄙夫
或詢諸耆碩父老人人致問事事細察毋惑於一
偏毋膠於一節回道之日務將詢訪所得來歷各

於本官下明白開註以俟參考 一謹官防巡按

御史務要嚴於律已所帶衣鞋等物止作一扛不過百斤其書吏監生行李共作一扛只此二扛緊於御史馬前隨行所至下馬與起程之際御史俱要督同各該府州縣掌印官三面將此二扛一一檢閱明白方許收放抬行并將書吏監生身上一併搜檢其卷宗簿籍等項公文裝載卷箱封鎖明白另委官一員督押至察院交割御史督同各該

掌印官逐一搜檢明白方許收受 一嚴督率布

按分司官例該二月初出巡五月終回司七月初
出巡十一月終回司奈何各官好逸惡勞不肯依
期巡歷又因巡按御史多住省城要得隨衆伺候
遂各託故專於省城安坐今後巡按御史務要嚴
督各官遵照事例依期巡歷不得輒便回司如敢
故違即行叅奏 一戒奢侈巡按御史務要躬行
儉約率先一方日廩五升之外秋毫毋得取費于

有司一菜一魚必以廩米照依時值易之仍遵照
憲綱御史陸路給驛馬水路應付站船監生吏典
承差陸路并騎驛驢水路應付遞運船並不得扛
抬四轎乘坐座船如御史不能以身率下好為侈
用不乘站船而乘座船不乘驛馬而乘四轎故違
憲綱臣等查訪得實叅劾治罪奉旨覽卿所奏深
切時弊都准行

左都御史孫丕揚內臺定規疏臣等竊惟天下之

澄清治人與治法兩者而已御史者身澄清之治
人都御史者總澄清之治法者也故四方之體統
欲正矣而臺體之因循當革為天下先百察之法
紀欲齊矣而臺規之參差當釐為百察倡臣不敢
遠舉目今掌道御史風紀之總會也相習為乍掌
乍更矣巡按御史省直之具瞻也相習為重內輕
外矣巡視御史畿會之首善也相習為月易季易
矣如是而望以澄清誰其任之此關於天下國家

非渺小也臣丕揚舊臺臣也猶能記舊章謹出千
慮仰塵乙覽倘大聖不棄乎芻蕘冀細流少裨於
滄海斯臣與諸御史之上願存焉其一曰專御史
之掌道臣惟十三道為言路關繫禮樂刑政罔不
察焉故事御史掌道恒用年深邇來定為六人規
矣然掌管數易政體推諉非計也臣謂專任使便
掌河南道者兼管福建道掌浙江道者兼管雲南
道掌山東道者兼管廣西道掌江西道者兼管四

川道掌山西道者兼管廣東道掌陝西道者兼管
湖廣道貴州道一如河南道考察不變之體而道
有定掌爲掌道之御史仍用年深先三差回者次
二差回者又次中差回者俱照隆慶二年事例劄
委掌管一年爲滿即准算差倘遇缺人差用亦必
掌逾半年始更易之而又立交代公移之簿以稽
職業斯則道務掌以定員事有專屬久任期以成
歲人有固志此澄清之總地所當議處者一也其

二曰重御史之按差臣惟兩京為根本重地十三省為紀綱專司官箴民隱御史肩之特稱隆重故事御史之按巡也必中差始畀按差必滿差始請代差必挨次始得擬差憲度森然莫敢紊者近見臺規多變體矣臣謂仍舊貫便順天即近不專資深以防擇人廣貴即遠不差初授以防擇地江浙即大不再酌量以防擇差不中差者非甚缺人不按差為不歲滿者即甚遐方不擬代為不循次者

非果南北原籍不易處焉差鮮蹤等人乏欲速豈
非蕩蕩平平光明正大之憲猷乎守此而練習弛
張整齊藩翰人人敦琴鶴之風省省奏青驄之績
方隅依藉豈其微乎此澄清分憲所當議處者二
也其三曰久御史之城巡臣觀居重要地孰五城
最哉巡視御史故事不專為喧鬧設者事有奸弊
依法送理正統間例也禁約賭博緝捕盜賊坐鋪
火夫究問優免成化間例也查問九門官吏多勒

客商財物弘治間例也訪察參奏打點饋送嘉靖
間例也至於禁止科歛詐騙裁抑豪橫奸頑安恤
孤獨良善懲創奢侈遊戲舉劾兵馬司善惡何莫
非御史事哉臣謂專責成便御史必用實授替差
必劄一年憲度必期力舉務相率而專心城務以
遏此城社之狐鼠收此輦轂之瘡痍而又省其外
班以杜請託立為歲冊以報滿政斯都人蝟冗之
穀絲蠶食之輻輳冀可彈壓之有資矣此澄清國

都所當議處者三也萬厯二十一年閏十一月上
答旨這所議有裨憲體著著為定規以垂永久

巡城要領

巡視南城湖廣道監察御史方震孺疏臣考前代
畿輔之政大都統於京兆而我朝則兼用五御史
意深遠哉蓋五府六部環集於輦下民無所知知
有巡城御史而已侯王保傅赫奕於長安民無所
畏畏巡城御史而已細而兒女小忿之爭俗而米

鹽瑣屑之事非質之御史不了也暫而徒步之相
搏久而畢世之深讐非質之御史不平也甚至覆
雨翻雲之奸布地遮天之手非御史不能摘而發
其覆也豪璫巨族炙手熏天可以一語折服之無
敢譁依城馮社深根固蒂可以寸檄招致之無敢
拒然則巡城之任綦專矣其權綦重矣故臣不遑
舉其枝節而但求其本源曰城規不可不肅也城
禁不可不嚴也城員不可不慎擇也巡方者例不

得攜家屬例不得受私書例不得尋常宴會何城

差獨不然終日拜客終日應酬蓋交遊雜沓則神
氣日分竿牘旁通則面皮難冷嚴於外而寬於內
豈用御史之初意哉所謂城規之當肅者此也頗
聞我皇初政都門白晝無敢持帕儀往來者而一
切白蓮左道捏謠造謗之徒皆潛踪屏跡可想見
一時振刷景象今漸蔑如矣即如經畧繫獄而靈
濟宮一弟一侄椎鑿之聲四聞又臣搜假印時無

意中得山人莊士元文書一卷皆係罪璫戚畹之
辨揭而其他一二尺牘深有可疑訝者乃知山人
墨客慣走豪貴之門而走險通神大為悠謬之口
此輩不驅除巡城者不得謝其責所謂城禁之當
嚴者此也京師者萬國之堂奧也而親民之官獨
兵馬指揮耳往時司官題用正途最有深意而不
知坊官之親民與司無差別也竊以為各城坊官
亦當以考選遺珠充之其體貌陞轉與司官等豈

惟司坊即宛平大興二縣亦當用甲科而治行之
最者其超擢亦當出諸藩上所謂城員之當慎者
此也總之有官不可以無法有統不可以無輔有
官有法有統有輔而所以治京師者過半矣

各差建置

自昔言官察官截然二項如宋時亦尚如此御史
臺中丞一人侍御史一人殿中侍御史一人以上
並係言事官監察御史六人亦曾許言事後來止

察事

宋制入臺有十旬不言事輒舉辱臺之罰竊謂過矣使時無可言固將強聒也故嘗謂臺諫之言事當論其大小不當論其疏數當論其緩急不當論其早暮

御史差委在內則京畿道刷卷及巡視京營提學巡倉巡庫巡視光祿清恤鹽課在外則巡按清軍刷卷巡鹽巡河巡關巡茶印馬屯田遇有征行則特遣鹽軍紀功

宣宗嘗諭左都御史劉觀曰中外文武諸司文卷已遣御史照刷其內府諸衙門皆有錢糧出納近聞其弊甚多即選能幹御史率監生於東華門外廡下取各監局文卷簿籍詳加磨勘有隱匿錢糧虛冒支給者悉以聞

景泰六年給事中李瓚言南北直隸學校俱無按察司官提督宜分遣御史二員專理始命御史葉巒張監督南北直隸學校會典不載

宣德二年差御史各處清軍後革歸右布政

舊制遣御史二員於長蘆兩淮巡鹽又遣御史分
巡南北河道有司供費不給景泰初給事中李瓚
以為言遂罷巡河御史二員令巡鹽御史兼之景
泰三年罷兩淮長蘆巡鹽河道命巡按官兼理正
統三年令每歲各差御史巡視景泰元年差侍郎
一員清理淮浙鹽法取回御史三年又令差御史
二員於淮浙巡鹽

舊制屯田俱增設僉事一員宣德二年始令巡按御史兼理屯田天順九年令南都察院差御史一員巡視屯田正德三年差御史督理北直屯田隆慶二年差都御史三員經理各處屯田

河東鹽池舊止以巡按御史兼視成化九年始專設巡鹽御史

永樂十三年差御史三員巡督陝西茶馬景泰四年仍照洪武中例差行人成化三年令差御史一

員於陝西巡茶七年罷差行人四川巡茶十一年
令取回御史復差行人十四年仍差御史弘治十
六年令取回御史命督理馬政都御史兼理正德
二年仍設巡視御史一員令仍前督理陝西茶馬
兼攝川湖等處地方

嘉靖中都御史汪鉉劾出差御史王宣譚纘沈奎
陳大器陸夢麟李美胡體乾陳世輔熊爵等九人
先後保薦官屬大計之日多以貪酷不謹敗宜連

坐請勅吏部視其多寡而議罰焉部覆巡按御史
濫舉四人以上者革職閒住二人以上者降一級
調外任一人者罰俸半年詔從之著為令

巡按御史復命以銷繳勘合七分為稱職近固即
其數而踰之者矣舊百執事各職其所司而今巡
按百務萃攬事大繁而反易集謂之何哉則其所
為集知非昔日之詳也按憲綱巡按受理詞訟必
自各衙門斷過不公者其所受理必親決不令批

發懸意向於喜怒夫然後事可立見而上下附同之流塞矣

歸有光云嘉靖乙卯侍御餘姚周公被簡命來按吳中故事御史巡行天下郡國率一歲還報公滿歲且去而吏民伏闕上書願留者數千人詔聽復留於是幾及三載公在吳每行縣還百姓扶老攜幼填溢街巷使車不得行

永樂初以山東道御史文郁不諳刑名改為工科

給事中又改江西道御史汪俊民為刑科給事中
舊制御史皆乘驢宣德間御史胡智言御史任紀
綱之職受耳目之寄糾劾百寮肅清庶政若巡按
一方則御史以朝廷所差序於三司官之上或同
三司出理公務三司皆乘馬御史獨乘驛驢頗失
觀瞻自今請乘驛馬許之著為令

永樂時都御史陳瑛言御史車舒怠惰不任事謫
舒戍邊因謂瑛曰御史當用清謹介直之士清則

無私謹則無忽介直則敢言不能是者即黜之

宣德時御史謝瑤薦牘誤書姓自陳改正宣宗謂
吏部曰古人奏牘皆存敬慎石慶書馬字缺點懼
及死今薦賢不知其姓豈能知其才輕率如此豈
稱御史之職遂謫交趾大蠻縣知縣

嘉靖間金符巡按山海關巡撫順天都御史孟春
論其行事乖張不諳憲體金符不置辯詔回道考
察謫河南鄧州判官

天順間御史李蕃楊璉巡按宣府遼東所過軍衛有司俱令擺列官軍遠出迎送上聞之大怒俱令拏問仍降勅申飭以後有司迎送路跪甚至鼓吹放炮開門一如制撫則萬厯以後事也

宋王炎雙溪集云昔漢部刺史以六條察州五條以察二千石而一條以察大姓強宗墨綬以下不與焉非固嚴於其大而畧於其小也以為大吏有所畏忌則其小者不治而自肅也今外之臺府與

內之臺諫均則有所奏劾矣竊謂臺諫不論貴近而論庶僚臺府不按郡守而按小吏則人情不服而法不法矣昔在荊州聞南軒先生有言曰帥桂四年但按四郡守微如簿尉縱有姦賊為害也小不若先治其大者此至論也

宋魏鶴山古今考載通曰秦以御史監理諸郡謂之監察史戰國策有韓安邑之御史則以御史監郡六國亦有之非始於秦漢省其官

提刑按察使

宋文恪訥曰考今提刑按察周命揮人以巡天下之遺意也自唐虞五載一巡狩考制度於諸侯至周封建廣五載巡狩之禮弗克行而揮人之制始興蓋以道國之政事而使萬民和悅秦起廢周制漢興雖不能復遣掾史行部郡國之治悉達於上無揮人之名法揮人之意逮孝武初置部刺史以六百石之微而察二千石之尊卑其職使自厲重

其權使自行誠一代美意良法也綏和以來制不
遵古始更部刺史為州牧職重權專遂流為藩鎮
之弊而古制泯矣夫按察始於唐提刑始於宋唐
則三年以遣使宋則諸轉運以兼職名起於近而
意沿於遠也皇明既一四海即分天下為十有幾
道立提刑按察使司有使有僉周適四方巡行風
俗上以宣帝命下以求民瘼按其官吏能否而進
黜之本唐虞之考績法漢家之分行此我國家統

紀之有經歟

唐置觀察使貞觀初遣大使十人巡省天下諸州
水旱則有巡察安撫存撫之名神龍二年置十道
巡察使按舉州縣再周而代景雲二年改十道按
察使開元二十年分天下為十五道改為察訪處
置使天寶末年又兼黜陟使乾元元年又改為觀
察處置使皆以朝官為之而藩鎮大使皆在所察
之中

宋仁宗時知諫院歐陽修請置諸路按察使疏臣
伏見天下官吏員數極多朝廷無由徧知其賢愚
善惡審官三班吏部等處又只主差除日月人之
能否都不可知諸路轉運使等除有賊吏自敗者
臨時舉行外亦別無按察官吏之術致使年老患
病者或懦弱不才者或貪殘害物者此等之人布
在州縣並無黜陟因循積弊冗濫者多使天下州
縣不治者十有八九今兵戎未息賦役方煩百姓

嗷嗷瘡痍未復救其疾苦擇吏為先臣今欲乞特
立按察之法於內外朝官中自三丞以上至郎官
中選強幹廉明者為諸路按察使自來雖差安撫
使緣管他事不專按察今請令進奏院各錄一州
官吏姓名為空行簿以授之使至州縣遍見官吏
其公廉才幹明著實狀及老病不才顯有不治之
迹者皆以朱書於姓名之下其中才之人別無奇
效亦不至曠敗者則以墨書之又有雖是常材能

專長於一事亦以朱書別之使還具奏則朝廷可
以坐見天下官吏賢愚善惡不遺一人然後別議
黜陟之法如此足以澄清天下年歲之間可望致
治只勞朝廷精選二十餘人充使別無難行之事
取進止

元于各路立行省中書以總大政即今布政使也
又立行御史臺以司糾劾即今按察使也至元中
議以行臺隸行省尚書董文用曰御史臺譬之臥

虎雖未噬人人猶畏之若加摧抑則風采蕭然亦無復可望矣

明初置提刑按察司謂之外臺與都察院並重故大明令按察司都察院並列不視之為外官也洪武時諭曰治吏之弊莫甚于貪墨而庸鄙者次之今天下府州縣官于斯二者往往有之是以弊政日滋民受其害故命爾等按治其地凡官吏賢否軍民利病皆得兼問糾舉建文中改為十三道肅

政按察使永樂中定今制按察使掌一省刑名按劾之事糾察官邪擒治貪酷禁誥強暴平讞刑獄雪理冤枉以振揚風紀故當時巡歷所及貪墨之吏伏首受法民困為之一甦迨後撫按之權重而憲司僅為承行之官此吏職所以日隳也

嘉靖十二年閣臣張孚敬攝都察院申明御史糾彈諸司而御史不法亦聽按察司糾彈臺諫不得挾私報復王廷相掌院請如孚敬議上曰此祖制

也掌院多事姑息巡按故縱按司畏怯殊非政體
令通諭行之

景泰三年十二月降湖廣按察司僉事黃潤玉為
直隸和州含山縣知縣以巡撫右都御史李寔考
劾其不諳刑名也

召對王副憲紀都察院副都御史王志道奏內臣
越職一疏云竊惟皇上差委內臣不過核錢糧兵
馬物料而已原非假以大臣小臣官評吏議也邇

年以來叅疏日上論劾漸廣內則糾科道六曹外則糾方面督撫又內則糾六曹卿貳今則糾輔臣矣此臣所謂越職也夫國家之設輔臣不但責之以叅贊廷議也宮中府中陟罰臧否皆其職掌若使內臣糾劾方面以侵撫按之權而輔臣不問內臣糾劾御史以侵掌院之權而輔臣不問內臣糾劾六科給事中以侵掌吏垣之權而輔臣不問內臣糾劾卿貳執政浸浸乎口含天憲手持朝綱而

輔臣尚不問則將焉用彼輔臣哉詩不云乎楊園之道猗于畝丘言自卑而高也夷陵之漸日甚一日始而忌芻馬終而迫堂廉遂使內臣得以操其長短肆其刺詆勢所必至無足怪者且中外諸臣其糾內臣者多矣輕者紛紛去國重者下獄置對而輔臣不能救也豈入告我后不使人知耶將欲問而不能也抑能問而不欲耶臣仰見皇上帝地之心內臣外臣原自一視至公也近來內臣所糾

輒蒙報可其糾內臣者未見一行輔臣何不舉而一體言之以成天地之公臣仰見皇上日月之照顯劾密察各有本末至明也就內臣中間有奉法循職者擅權越局者原自不同輔臣何不舉而分別言之以成日月之明臣仰見皇上雨露之澤體悉羣臣無所不周至仁也今之建言者與被言者或放歸田里猶可引分自安或薄示降罰猶可勉力補過至下法司下詔獄如馬思理高倬王忠孝

孫肇興等寔無不赦之罪而有可原之情輔臣何不一舉而以解網爭之以速雨露之澤若此一事中外無不以之責望輔臣而尤以之責望首輔首輔于此必極力擔當乃或可自安如再默默憤憤何以仰副明主知遇諄諄諭留之意哉內臣之得失漸莫敢言南北之水火構鬪已極固廷臣之患亦非內臣之利也雖然猶可言也士氣易激亦易靡名義易爭也勢利亦易合也自今以前固患其

爭自今以後猶慮其合也合則角口且化為稱頌
不可言也履霜堅冰由來者漸不見其形願察其
影皇上清明在躬睿照如神何隱不燭豈待莛言
抑臣心所不安不敢有隱于君父之前且備員執
法不但輔臣有以道事君不可則止之義即微賤
陳力就列不能者止之分也崇禎六年癸酉二月
初八日庚午上召輔臣等并五府六部都通大翰
林院記注官吏科等科河南道等道及京營總督

協理錦衣衛堂上官來文華殿上御文華殿諸臣
于門外行叩頭禮訖上尋命卿等進來諸臣肅班
而入東面鵠立上首召王志道都察院協理院事
左副都御史王志道出班跪上曰遣用內臣原非
得已屢有諭旨極是明白如何又有這一番議論
昨王坤疏有旨責他率妄大體已存了如何又牽
扯許多說內臣叅的處了叅內臣的又處了但是
處分各官都為內臣這等朝廷之上別無政事都

是內臣了種種誣捏不可枚舉別的且不說即如王忠孝臭爛米豆人馬都吃不得他所管何事這樣的叅來該處他也說是為內官處了還說他臨訊時不能具一食一文他若無情弊為何肯放這樣米豆又如為草場處的為軍器處的都說為內臣又說一稍輕一獨重前兩廠已幾次從寬僅止降罰盔甲廠這番軍器着寔不堪所以重處那安民廠稍堪所以稍輕那掌廠臣內臣劉守乾也是

一同提問的如何止說是為內臣又如修整城守

軍器正是先事綢繆金鉉奉旨管理連砲眼也都
不開可不誤事胡良機巡按宣大二年不為不久
撫賞大獎毫不覺察這也是不當處的總是借一
箇題目湊砌做作落于史冊只圖好看一味信口
誣捏不顧事理但凡叅過內臣就是護身符了隨
他溺職悞事都不誅處這是怎麼說志道奏曰神
聖在上豈容內外臣不奉公守法其有不奉公守

法者皇上自有鑒知止為近日內臣叅劾漸廣諸臣受罪者多外庭皆以申救責備輔臣臣知無不言不敢不採外庭責備之言入告及輔臣為王坤所叅舉朝皇皇為紀綱法度之憂臣仰體皇上好問好察無所不照豈可使中外有紛紜之疑不以上聞臣聞海愚材自以為輔臣該言的臣亦該言內臣既可糾廷臣廷臣亦可糾內臣其為法受罪諸臣風雨露雷無非皇上之教生死榮辱無非臣

子之分臣豈敢為諸臣出脫至臣疏中不能詳慎語多謬悞罪當萬死時志道說謬悞二字語音不朗上問輔臣是說甚麼輔臣延儒代奏曰謬悞上曰有這許多謬悞來你在朕前便說謬悞書之史冊就不謬悞了上又曰爾為憲臣從來有何建白既是知無不言還有軍國利弊大事何不奏來上再詰之志道奏曰兵馬錢糧物料三者寔當今急務此外未敢及上曰爾前疏只說王坤應管兵馬

錢糧不該輕意侵及輔臣這就是了如何有許多
說話不論該處不該處一槩都是為內臣難道朝
廷政事都是內臣做了你說輔臣有言臣可無言
輔臣有言你知道麼多少關係國家大計一件不
說只因內臣在外不便作弊恰好有王坤一疏便
張大起來有許多說話分明遣內臣一事先前面
諭你都盡知今故意借箇題目挾制朝廷不便處
你可謂奸巧之極多頃上曰前年敵薄都城下那

是誰致的諸臣就不說了文武各官朕未嘗不信
用誰肯打起精神寔心做事只是一味朦朧諉飾
不得已差內臣查核原出一時權宜若是參來不
行差他做甚麼你們外臣果肯做事朕何必要用
內臣輔臣周延儒溫體仁吳宗達鄭以偉徐光啓
等同出班跪延儒奏曰臣等輔理無狀表率無能
在內部院各衙門在外督撫按各官不能盡心修
職以致封疆多事寇盜繁興皇上萬不得已遣出

內臣查核邊脩原是憂勤圖治之苦心屢諭甚明
外廷皆知今于皇上原無不頌服只是臣等罪狀
多端所以外廷都來責備王志道說臣等不能申
救不能執爭也是外廷議論他就輕率入告了伏
望皇上特賜優容外廷愈知感頌聖德上色稍霽
曰朕昨在講筵前日在平臺面諭卿等甚明他這
等議論正是借好名目挾制朝廷不便處他輔臣
延儒奏生殺予奪聽命皇上朝廷處人誰敢挾制

適蒙聖諭詰責王志道種種誣捏情罪甚明原是該處只是他的本心原非敢議論朝廷亦不是專為內臣其意只是責備臣等溺職臣等原寔有罪義當任受伏祈皇上委曲寬宥外廷人心自皆帖然決不敢再有煩囂瀆擾聖懷上曰各人分內職掌不修假借虛名張大其說占一箇好地步再不管朝廷事體若何此是何心似這樣人品可堪憲紀表率諸御史可使得麼上徐命輔臣承旨歸班

上嘿思久之曰疏中誣捏款項還說不盡本該拿問念輔臣屢次申救候旨起去志道叩頭退上召吏部尚書兵部尚書都察院左都御史吏部尚書李長庚兵部尚書張鳳翼都察院掌院事左都御史張延登同出班跪上曰吏兵二部用人根本近來弊竇最多未用一官先行賄賂文武俱是一般近聞選官動借京債若干一到任所便要還債這債出在何人身上定是剥民了這樣怎的有好官

肯愛百姓卿等新任須把舊弊徹底清釐情面一
毫不顧纔用得好人纔盡得職掌若別人說的就
用自已漫無主見大悞事情朕前日為兩部尚書
費幾許推敲纔用卿等二人須能革去舊弊用好
人才為國家任事纔不負委任吏部文選司兵部
職方司尤最緊要吏部十三省一省一人原為要
知那一省人才其實名雖為公實未必然他們何
曾用心遴訪到了用人的時節仍舊南直不知北

直北直不知南直今後若司官不堪有徇情的作
弊的有抗違的就要叅來不要說堂屬一體只徇
情面若見有人向部裏囑托把持也要據寔叅來
輔臣延儒從傍奏曰吏兵二部須是自己能叅別
人不怕別人叅方能任怨任事上曰各盡職掌朕
自鑒裁浮言豈能動朕臣長庚鳳翼奏二臣皆自
田間特恩起用敢不盡心圖報今蒙聖諭督率司
官如有不遵的自當叅奏臣等或有錯謬望聖明

寬宥至于情弊不敢曲徇上曰情弊須從卿衙門
清楚用人須要自己主張若推那一員官俱憑人
說就用或只憑鄉紳保舉這都不是就是其中也
有人地相宜的畢竟還該從公慎擇若一味聽徇
又何消要部裏今後不許只據舊訪單塞責及情
面囑托這樣事情一定重處這是甚麼時候內外
種種多故大小臣工也俱不能辭責推用人才俱
在卿等兩部源頭清楚用人自當若是人才那一

個不堪就是那一個源頭不清卿等責任豈輕如
今所做的事都是天事謂之天工須着盡心纔是
若只循舊套推陞的幾個官不過執簿呼名一吏
足矣要尚書何用又如吏部情弊極多正該責成
司官稽查覈察各樣事體不可但委吏書臣長庚
奏吏書之弊只有小官至于大僚皆臣等之責不
敢有諉其諉訪舊單近奉明旨不得濫用以後務
要新行諮詢仰體聖懷臣張鳳翼奏當今邊事未

靖流寇內訌只因將不得人此皆臣等之罪推官
一事向來武弁原有鑽營皇上神明在御此弊竟
無上曰一毫情面不顧徹底清起纔能用幾個好
人若就說無弊怎能得穀先年職方司郎中方孔
昭有一個總兵求推謝銀三千兩這是怎麼說一
到地方自然剝軍了卿等身為大臣須要潔已率
屬上又諭張延登曰都察院風紀重任表率那御
史巡按是朕所行不能到的要他去巡何等關係

御史巡方賢否全在考核如今一概回道稱職只憑河南道一本文冊說舉核過文武若干積過穀石若干舉過節孝若干便完了事就是地方有悞事的有奉旨着回道嚴加考核的還要替他委曲出脫或說是前人的事不是他任或說是前行各樣事都好只因一時偶悞將就罰俸降級了不肯處一個成甚麼憲體臣延登奏天下百姓窮困全是吏治不清御史激揚無法臣見奉不時叅處之

旨不職者即行奏聞決不敢從寬上曰只要當不
是從寬果能有實蹟的是稱職若無大錯亦無大
功這是平常如有地方失事平日本無整飭或隱
漏不報或糾舉不當這就不稱職了如今連平常
的也沒有都是稱職有些過失又替他解脫不擔
勞不任怨都察院如此落得做個好人御史怎肯
盡心那御史差出去處一應吏治賢否俱在舉劾
若一失當下邊怎了臣廷登奏不敢不嚴加考劾

上曰考劾須認真查核若只憑河南道文冊不過故事臣延登奏案呈須由河南道臣當另行多方採訪不敢全憑他人文書上曰卿是此院新任自能盡職如以前這都察院都着實不堪昨日卿上一疏專講御史陞轉可是御史陞轉不去是第一緊要麼每見新任都有一個條陳其實只是套子不拘得個溫旨嚴旨就是臣延登奏臣昨本非敢徇情只因目前二月該推陞之期前奉旨御史差

上者不准陞在籍者亦無多人此本不得不請旨
遵行上曰考選科道祖制極是慎重不論方隅不
拘甚麼人都可教他做只要取歷練老成蓋為老
成則自然正直誠朴沒有那虛器詭詐的事情了
如今的考選只憑那一篇文字你們中過科目的
文字原是會做專考他何用試御史原是試他才
能果堪方纔實授今做了試御史就必定實授再
不下來了科道陞慣京堂視為捷徑就極不堪的

也陞布政按察兩司去了陞知府的都少這是怎麼說上又諭三臣曰文武本原在吏兵風勵在都察院責任不輕且莫說用的都是賢才但六部都察院七員都是賢才便能治平如今邊疆未靖插首挾賞流賊蔓延何等時候文武諸臣不求匡襄實績單借虛名張大其說落于史冊昨九卿公本科道公本詹翰公本內中也有不願列名的也有是寫上若不著上名就不是了王坤疏來有責責

他妄言已存體了王志道疏內許多誣捏着實不堪奉旨詰問回奏纔少平些臣長庚奏皇上屢諭甚明遣用內臣為兵馬錢糧不得已而用近因王坤一疏叅論閣臣及在廷諸臣出於兵馬錢糧之外不但諸臣不能仰體皇上遣用內臣之心王坤亦不能仰體皇上不得已之心所以具有公疏至于王志道言語激切無倫誠為有罪但言雖有謬心實無他伏望皇上寬宥至於有罪者不獨王志

道一人臣等俱為有罪統候皇上寬宥上曰卿等公本意在存體防微旨已明白國之大臣朕所倚仗不可如小臣輕佻不諳事體借個題目就做起來今大敵要東就東要西就西如入無人之境尚可謂中國有人麼這個不羞不憤却羞憤別事臣長庚奏聖上屢諭甚明自有聖斷臣等自宜靜聽聖裁其王志道回奏因威嚴之下言語瑣瑣冒瀆臣等都說他不是總之諸臣為求寬宥之意至於

聖上不得已之心閣臣嘗傳於臣等盡知在外小
臣有不盡知的所以過疑又諸臣之罪俱有本末
各自不同上曰面諭已明不必又說上又召六科
十三道吏科都給事中劉斯垓等河南道掌道御
史李日宣等俱出班跪上曰爾等俱是言官以言
為職若條奏切實有裨軍國直言讜論朕甚樂聞
如何動稱言路閉塞又說似通而實塞你們議論
不管行得行不得只條陳一本塞責還有只為情

面賄賂的成何言官就如各處兵馬錢糧那一處不差爾等查核何曾肯摘發奸弊到壞了事又身處其外要差爾等何用平日具疏每隱顯閃爍就是叅一人也不指他實蹟薦一人也不指實他名節都故意如此還有做的不好的就是叅堂官一本叫他不便考核吏科都劉斯垓奏臣等職任言路有聞必告一毫不敢欺皇上上曰有聞必告這一句話是從心裏說出來是從你口裏說出來你

們有一疏定有一緣故與那疏中所說之事不相
干言官為朝廷耳目不聰明諸事俱廢了自己作
弊倒說別人作弊自己壞法反說別人壞法豈成
言官以後如有把持囑託行賄的發覺出來自有
祖宗之法在上命起去科道俱承旨歸班上曰方
今多事之秋大小各官通要實心實意做事諸臣
盡出班跪上曰既做一官就有一官職掌件件都
該憂思件件都該打算天下方能治平不可借一

虛名張大說去徒滋煩瀆輔臣延儒奏目今時事

多艱各官本等職尚料理不來那虛名空言有何
益於朝廷適大小諸臣欽奉聖諭自當儆省惕勵
實心營職不敢輕率紛擾只臣等才力庸淺雖辦
事閣中此心不敢不盡其實毫無幹濟上曰卿等
匡贊居多近來言官上疏動輒說知票擬也只是
擬得候朕裁奪難道擬了就是了何不竟說是旨
又說個擬字今言官見一旨意就問道何人票擬

最為可惡輔臣延儒奏臣等職掌正叫做看詳章
奏一應旨意都是聖裁王言臣等也只是稟承奉
行上曰這個也還論事體如何有可的卿等贊襄
有不妥的卿等匡救卿等在外邊聞見真至於只
說卿等票擬難道竟不候朕裁奪輔臣延儒奏外
廷人情揣摩議論票擬一節果是有的大抵或因
奉了嚴旨或所言不行就議論到票擬上來總是
借名責備其實臣等都全不照管上曰若是照管

就沒有這些話說又如朕所裁的便說是中旨中旨兩字是怎麼說是從宮中傳出來的是不應從宮中傳出來這不可解輔臣延儒奏這個議論倒是沒有那中旨之說還指數年以前恭惟皇上御極乾綱獨攬事事親裁不惟臣等深服即外廷亦毫無間言輔臣溫體仁奏果然外廷絕無異議輔臣溫體仁又奏閣中看詳原稱密勿外廷何由而知輒傳係某人票擬這都不是通應嚴禁上曰正

是內閣舊制原不許外人擅入前卿等曾經條飭就是跟隨人役也都有限制如今還要嚴謹上謂延儒曰卿職掌甚重今後中書等官與跟隨下人都要着實申飭有不遵的叅來重處前日如童夢蘭這樣的最為可惡輔臣延儒奏外人自可譏防這是該閣中供事員役所以防範不到止是臣疎庸之罪上曰以後嚴飭中書等官不可容留這等員役在內輔臣延儒承旨歸班上曰方今民窮財

盡各處盜賊生發都是從東事起必須東事平了
百姓方可安寧這個事不做如何專做題目圖個
名色好聽輔臣延儒奏各官好名之念果是有的
皇上待之有道自然無名可沽上命卿等起來諸
臣承旨歸班上命賜茶諸臣出殿門外叩頭謝恩
而出至二月初九日奉旨王志道風憲大臣輒敢
藐玩屢諭肆臆誣捏借端沽名臣誼安在本當重
處姑從輕革了職為民目今邊疆多警民困時艱

朕衷日夕靡寧大小各官俱宜洗心急公修舉實
職以副委任不得挾私紛擾徒淆國事以後有違
的嚴治不貸

召對劉總憲宗周紀崇禎十五年閏十一月二十
九日上常朝畢有旨傳內閣五府六部九卿科道
等官及起居記注官來中左門召對賜各官茶餅
午刻上出御門各官行叩頭禮畢上諭九卿科道
公議督撫去留處分限五日內如何不見回奏各

官皆出班俯伏吏部左侍郎王錫衮奏二十三日奉旨公議督撫次日即傳知會約於二十七日集中府會議二十五日大選二十六日冢臣鄭三俊偶病未出止移文各衙門令具議單送臣部酌定今單尚未繳所以稽延上曰時事甚亟如何可遲今日就於直房公同確議禮部尚書林欲揖奏要地督撫關係甚重議去一人必先就近擇一堪代者如未有其人而遽議去者五日京兆恐誤封疆

上曰前有旨諭選才望堪任的即推不得聽人規避有不堪的即時更換總要大公至正可作速確議上又諭科道官來吏科都給事中吳麟徵奏臣等識見庸淺不能仰副皇上求言之意或言之不當或言之過切又蒙皇上一概優容以致諸臣忘其愚賤輕有聒瀆如同官姜埰干犯天威亦皆臣等之罪但姜埰作令清苦居官謹飭身體孱弱多病伏望聖恩寬宥上曰目今邊疆失守警報日聞

已閱兩月之久文武諸臣竟無人能展一籌為國
家捍禦之計爾時聖容惻然垂淚曰朕無面目見
爾等只以優容為言前日御史王孫蕃叅內臣王
裕民即時正法何嘗不納言初九日朕諭內有一
段申飭言官爾等各宜警省無則加勉有則改之
時大臣有庇薊督范志完宣督江禹緒者言言姜埰
路欲攻之不密大臣先請上申飭上不悟也姜埰
不遵朕諭反來詰問安得不重處爾言官以言為
職當言的不敢言敢於欺藐二十四氣之說事同

匿名見者尚當焚燬乃屢見奏章不得不於姜埰

疏上一問

吏部侍郎蔡奕琛貪狡異常御史成勇叅之下撫按察經年不敢問科臣袁凱

孫承澤力糾逮之至京復捏二十八宿錦囊計邪說希飾罪刑部審明擬奕琛戍發遣後復捏二十四氣匿名帖託其親官金吾者揭之皇城內外前此為枚卜處分六人此番劉公金公皆氣中人蓋已深中其毒矣爾言官為朝廷耳目自己不正何能正人

文武大小諸臣各盡其職何難滅敵精神都不用在國家上敵勢如此諸臣同在漏舟之中誰無忠義誰無廉耻但不肯奮發任事都是一味浮泛瞻

徇麟徵奏皆由用人不當如目前要地督撫委實
不堪言官多有論列但言官職在糾彈用舍原在
吏部先臣王恕馬文升做吏部時言官糾彈一疏
有多至一二十人者及下部覆必詳細分別某人
應留應去某人言當不當彼時言官亦無敢譁言
官只管言即言之當否與稱職不稱職自聽朝廷
處分此後邊疆用人言官糾正吏部詳核更得輔
臣主持天下事猶可為上曰已屢有旨了麟徵奏

頃熊開元亦以奏詰輔臣周延儒得罪雖是出位
妄言第諺曰家貧思賢妻國亂思賢相封疆事敗
壞至此豈得不責備首輔此亦人情所必至總是
姜埰無知出語不倫開元亦是熱腸但言之不當
上曰熊開元假託機密陰行讒譖小加大賤凌貴
漸不可長前旨已明起來黃澍奏往河南慰安周
王賑恤安民上嗔其奉差已久起身太遲戶科廖
國遴糾宣督江禹緒委却御史周燦請逮不用命

行間諸臣御史楊若橋舉湯若望教習火器左都御史宗周駁之謂國之大事不專恃一火器近來通不講人才不講兵法任賊到一處殘一處到一城陷一城豈無火器湯若望向年倡說天主邪說蠱惑中國人心堂堂中國止用小伎禦敵豈不貽笑天下又奏若望小小伎倆何益成敗之數只要法紀脩明賞罰妥當使人心震悚庶幾閭外用命可望成功上曰如今從頭整頓做起還該做那一

件宗周對惟在皇上命吏兵二部慎選督撫簡將
練兵若是文官不要錢武官不怕死何愁不太平
如今只管說選才望不論操守致有使貪使詐貽
害至此上曰督撫自是要才守兼全宗周奏須操
守為主上曰大將另有一段才幹不是區區有操
守的便做得宗周奏范志完平日操守不好今又
貪冒尅兵以致軍心渙散上曰知道了戶部尚書
傅淑訓又救熊開元姜埰上曰面諭甚明不必申

救宗周奏朝廷待言官有體言官進言可用則用之
不則置之即有應得之罪乞敕下法司原情定案
今熊開元姜埰狂躁無知不能無罪但以皇上
急切求言而二臣因言下詔獄大於聖政國體有
傷恐非皇上求言初意臣願皇上俯念時事艱危
擴聖度於如天以開諸臣諍諫之路如臣宗周曩
亦因言獲罪中道再疏冒瀆蒙皇上不加斧鉞放
還田間復荷賜環起用是臣之罪實甚於二臣臣

何幸而遇皇上之優容二臣何不幸而不蒙皇上之恩宥也臣又有說於此前黃道周言語激烈有朋友不能堪者我皇上不但待之以不死且在起廢之列今二臣慙直不及道周道周何幸而遇破格之恩二臣何不幸而不蒙法外之宥也上曰人臣見有無禮於君者即當糾劾三法司錦衣衛俱是朝廷衙門你說言官有體假使貪贓壞法欺君罔上溷亂紀綱的通是不該問了宗周伏地叩頭

奏云臣謹請罪上諭曰黃道周聞他有學有守用
係特恩怎得引他比例似爾愎拗偏迂成何都察
院卿等起來劉宗周候旨處分閣臣周延儒等合
詞申救蔣德璟吳甡言之尤力刑部尚書徐石麒
奏臣在直房與同名諸臣商議熊開元姜埰有罪
仰干聖怒臣等宜代為請罪叩頭乞恩俟聖俞始
起不意臣需次未言劉宗周隨即申救語言慙直
若論起事罪實由臣伏乞皇上將臣處分寬宥宗

周不勝感激左僉都御史金光宸奏劉宗周申救姜埭熊開元非從二臣起見幸逢聖明從諫如流無非願皇上為堯舜之君廣納言之美主聖則臣直一時不識忌諱伏乞俯賜優容兵部尚書張國維奏劉宗周清執素著即如臣受事之初宗周相會即以操持砥礪謂欲整釐部務在端本澄源臣服膺其語但於朝班相遇一切調度每多商畧方今多事之時老成當惜伏乞聖明寬宥上曰熊開

元這疏定有主使想是劉宗周主使了

主使之說先有大臣

密揭熊姜二人在北司已嚴刑問主使之
人上諭但打死有我作主不妨語

兵部左侍

郎馮元飈哭泣救爭衣袖盡濕金光宸又奏頃臣

聞皇上諭熊開元疏想是劉宗周主使臣以宗周

賦性硜直客也不會與熊開元實不相往來宗周

與臣同官臣極知他就是前日恭聆皇上面諭不

但姜埰熊開元二臣有罪臣等俱有罪皆惶懼不

安即宗周在外邊與臣等也說他不是因皇上面

諭遂不覺以忠愛之心披納牖之益其實從君德起見宗周在衙門百事整頓即皇上所頒憲綱見在奉行日與諸御史申飭前同臣察理城守不避風寒老成可念上曰金光宸也著議處光宸奏臣忝風紀之地每與宗周言要天下治安全在撫按若撫按盡得其人天下太平宗周為人清直在衙門就是不動聲色人心也是振肅的皇上若是留他這個老臣願將臣罷斥臣如有一字之欺願甘

斧鑕工部尚書范景文及五府勲臣同出班力救
上曰面諭甚明卿等不必申救起來劉宗周金光
宸先出候旨爾九卿科道在直房議來奏時已過
酉諸臣入直房會議督撫去留處分事隨列單恭
進傳諸臣各退召輔臣再入隨傳旨劉宗周革職
刑部擬罪即奏閣臣持不發同捧至御前力救首
輔言詞甚婉蔣德璟曰向前唐太宗惡魏徵直諫
入宮怒說會須殺此田舍翁皇后具服賀曰君仁

則臣直語未畢上遽曰唐太宗才朕所不如若論
閨門德行朕亦不學他吳姓奏皇上當學堯舜安
肯學唐太宗只是唐太宗巧於取名上問怎說姓
奏人臣敢言的用之則名在人主罪之則名在人
臣太宗本不喜魏徵故欲優容他以自成其名上
默然久之乃去刑部擬罪數字時刑科都給事中
孫承澤以病註籍次蚤上疏云為聖度本自如天
憲臣去國可惜伏乞俯賜轉環以光聖德以重風


紀之任事臣聞風紀之司國是寄焉得其人則足以肅百僚失其人則無以定衆志故恒當慎重其選未可輕為更置也邇蒙皇上起劉宗周於廢籍而為風紀之長臣適奉差在外遠邇相傳無不加額以為聖朝美政及臣北上見其經過之地人曾望其丰采及聆其語言又無不轉相稱說以為慶幸蓋宗周四朝耆舊一介孤清事必合乎古人行必準之理道其迹似迂其氣近慤要本之忠君愛

國而其學無欺昨蒙召對語詞過激衆為之危仰
賴聖度寬容不加嚴譴我皇上之量真天地覆冒
之量也我皇上之心真堯舜闢門之心也在宗周
不知如何感激如何追悔行且青衣小帽策蹇就
途臣意近年來署位之間規利圖便恬不為非以
致是非不明功罪罔定外邊內賊相因益熾自舊
臣登用始知人間有廉恥事語云山有猛虎藿藜
為之不採言國之重臣不可無也今宗周就職未

久突不及黜落職遠去士論能無共惜至貪憲臣
金光宸冰蘖為心薑桂成性正色立朝有古大臣
風往年按豫愛民如子嫉貪如讐一時墨吏望風
解綬豫之人官於京師者類能言之幸於摧折之
餘畀以佐憲之任今亦以語言失檢同時獲罪在
二臣戀主固有熱腸而恬退亦其本性但兵戈壓
境之日豈放逐舊臣之時在朝廷無不愛惜之人
才在臣子難廢執奏之大義伏望聖慈矜其小過

錄其生平允大小臣工之請還兩臣原舊之職必
能益勵晚節振揚風紀所裨於國是不小矣臣患
病伏枕因思大政所關不避斧鉞倘蒙皇上留二
臣而罷斥微臣即死有餘榮矣上令部議處罰俸
三月又次日劉公騎一驢一僕負襆被出順城門
金公降調聞艱歸徐公石麟亦投劾去

春明夢餘錄卷四十八



總校官庶吉士臣侍朝

校對官中書臣孫希旦

謄錄監生臣何瑞